

已具聞未審上下二元依何法式

釋曰此三元齋法俱在衆經道君恐來代
愚家多所不悟再與高問莫垂未聞於此
會中殷勤重請天尊所答其此若焉

天尊告曰此三元齋三錄定簡靈寶要文正
月十五日者此爲上元天官檢劫十月十五
日者此爲下元水官檢劫此者所攝不同

釋曰此即天尊告示三元由委言此三元
之法是三錄定簡出靈寶要文所攝不同
者爲上元左府主生太陽火官考下元
即右府主死太陰水官考中元主生死
簿錄一切地獄囚徒罪福之事風刀之考
各領察九萬衆凡有一十二月其中元下
元三府兩同然香旋遠者各爲上元知生
下元知死之途既別統攝是以不同故云
所攝不同

今所陳說七月十五日作玄都大獻者此乃
總管上下二元故以相告宜遵之焉

釋曰此言中元通括上下一切都和勤當
餓鬼囚徒並在今日但今日中元道攝上

下二元其功最重故玄都獻法校度先亡
所以不言天官水官唯稱中元者唯中元
地官地官處中是正色故舉中元以攝
上下又萬物至秋皆悉成結所以取其方
金即熟故以七月十五日中元之辰以爲

供養又一切餓鬼罪鬼今日皆蒙釋放
中元教戒之日玄都大獻之晨常須建福修
齋行道誦經供養三寶校度亡靈既此一時
地獄囚徒咸蒙福祐導則享祚洩則禍臻
釋曰但天尊奉大獻之供享福無極輕洩

大獻之經則禍臻萬劫
太上道君十方大聖飛天神王七千二百四
十童子聞是說已一時歡喜作禮而去
釋曰上聖慈悲常惟校度至於宣揚妙法
先闡玄風冀其至言寧不歡喜於是虔心
踴躍作禮而行各適彼方殷勤教化

太上洞玄靈寶三元玉京玄都大獻經

三經同卷

太上洞玄靈寶三塗五苦拔度生死妙經

太上道君說解冤拔度妙經

太上洞玄靈寶往生救苦妙經

服三

太上洞玄靈寶三塗五苦拔度生死妙經

靈寶天尊時於長樂世界香林園中與五老
上帝十極天真三清諸天無極聖衆演說微
妙玄一真經不二妙門重玄之理預是衆
咸聞法音了達希微到真常境人天歡悅難
可稱焉爾時天尊即放九色微妙光明徧照
十方無極世界天上地下內外洞明等若琉
璃無所隔礙乃見九幽之下地獄之中無量
衆生受諸苦惱三十六獄考治罪鬼執罰神
兵巨力士三官九府百二十曹考掠縱橫
無時暫歇或抱銅柱或卧鐵床或上山或
攀劍樹身有鐵杖頭戴火山或入鑊湯或經
鑪炭倒懸倒立碓擣碾磨渴飲火精飢則食
炭或洋銅灌口百節火然或硃石逼身針鋒
貫體或墮燬之內南北跳踉或寒冰之中肌

骨分裂鋸解刀斫鳥啄蛇吞或長釘釘身或鐵犁耕舌或糞穢臭處或連汲深波或負鐵擊山填河灌海或牛頭折脊或銅狗噬身倏忽之間萬生萬死受諸苦痛億劫無原或報訖受生方為異類或為猪鵝鷄鴨生設由人或為驢馬牛驢受人駕馭或為麀鹿野獸飛鳥禽魚毒虺惡蛇豺狼虎豹噬相咬食展轉無窮或得為人身嬰六疾盲聾喑足跛手攣癩體膿瘡舉身爛壞鼻梁崩倒癩病癡狂或長病纏綿困苦床枕或形容醜陋智慧不圓或凍餓飢寒貧窮孤露或為下賤奴婢之身拘抑由人不得自在如是等罪如影隨形億劫輪迴未嘗休息是時眾會見此因緣悲歎驚嗟咸懷慈愍於是眾內有一真人名曰法解即從座起從容雅步嚴整衣冠稽首天尊五體投地前進作禮上白天尊言臣奉侍以來于茲累劫三清境界金闕瓊宮恬淡無為道速快樂宴遊真域餐聽法音自此歡娛動經載劫不曾見此生死因緣六道循環無窮苦惱不審向來光內所見罪業眾苦備經

受罪無已前生何犯今世何緣致受此身纏諸痛苦思惟大聖示以未聞得悟罪根因緣所起施大法藥醫救沈淪震大法音開悟愚暗靈大法雨灌沐身心散大法雲騰覆羣品乘大法炬照燭幽昏開大法門汲引羣迷如蒙慈誨仰荷玄恩

爾時天尊答法解曰善哉善哉汝以慈憫念此眾生善得機宜請問妙法為將來世一切有情作法舟航作法燈燭作法梯登作法橋梁濟度羣生出離罪惱破諸地獄升彼天堂彌歷劫年度人無量諦聽諦聽當為說之夫世末時說人民澆偽為善者少為惡者多不孝不忠不仁不義不慈不信不讓不廉傲忽正真輕慢三寶嘗毀經典誹謗法門害物傷生貪殘無厭六情五慾三業十纏營造罪根結諸惡業自作自受猶響應聲終劫說之亦難可盡略舉其要罪惡源由名曰三塗五苦八難此等惡趣出離最難非我法門無由超度所言三塗者一者地獄考對前非二者畜生償酬往業三者餓鬼苦對最深渴飲火精

飢則食炭五苦者刀山劍樹銅柱鐵湯連汲深波是名五苦八難者一者得生人道二者去女為男三者形體完全四者得生中國五者值有道君父六者稟性慈仁七者值國土太平八者與三寶相遇八者備足是大善因有不備者是名為難以此諸苦流浪不還展轉漂沈與道長隔耽墜五濁執滯六情外觸內侵殃纏禍染眼耳鼻舌身意六塵好醜是非念念相續一失人路墮地獄中長夜冥冥無由解脫法解又曰眾生妄想不識正真執繫是非循環罪業運心任意皆是罪緣人生幾何即生即滅如彼石火不得久長如彼浮泡曾無堅固生老病死日夜相侵變滅不常須臾散壞苟得富貴猶暫片時况更飢貧憂悲苦惱或嬰六疾不具足身及至死亡又還地獄如是之苦甚可哀傷惟願大慈廣開方便示以大道極拔之門使此輩罪業及來生男女咸得法利普入福堂

天尊答曰若有眾生三業淨者不墮三塗所言三業者身業心業口業是也身業者姪殺

偷盜心業者嗔貪愚癡口業者綺言妄語兩舌惡罵此三業者是十業根障蔽善緣滋生罪惱若能清淨求免三塗若有眾生五毒淨者即離五苦所言五毒者眼觀五色耳聽五聲鼻貪五香舌知五味心生五慾為五毒根終劫纏綿無有解脫若能清淨五苦永除若有眾生修八行者超度八難與道合真所言八行者一者孝行二者仁慈三者貞廉四者忠信五者善忍六者柔和七者奉戒持齋冥心大道八者平等接物無有冤親以此薰修善功充滿身超八難永契仙階此上法門修行要義轉塵入妙證道登真三世天尊十方大聖皆修此行升入無為故以慈悲愍念羣品應當敷演宣示未聞於苦海之中愛河之內以吾法教撈漉眾生使來世男女咸知修奉出煩惱網斷疑惑根登解脫山到逍遙境身心清淨深入法門法解又曰三業五毒八行等門不可思議最真最妙將來之世及見在人天聞此法音便應解悟况更精進依按修行當知是人決定成道然地獄之內見在

幽鬼拘閉寒庭往來長夜風刀切骨眾苦嬰身食息無停輪迴不已及諸來世一切之人或有死亡應當速拔願垂開悟賜以訣言使人鬼蒙恩死生開度

天尊合曰遷拔之格救度之文三洞眾經具有成與今當為汝宣說要言諦聽受持廣加流布夫學道之士立德立功鍊氣坐忘修真服御宣經演教佐國度人種種皆修是真行業功行雖備果業雖圓亦須先度九玄七祖父母亡靈遷拔生天鬼錄盡除身方得道况復世界流俗之人若孝順男女父母亡歿及諸眷屬應有終亡恐彼鬼靈墮三惡道或入地獄或入羅剎幽閻冥實備經眾苦須憑功德廣修福田救度窮竟解脫過此境界東極言中有尋聲救苦天尊大慈仁者發弘誓願普救眾生億億劫中度人無量但能回向一念歸依法想尊容稱揚名號尋聲赴感應念普慈一切苦中無不救護是故名號救苦天尊尋聲勸眾生勤加禮念復次三洞經典之中添苦拔亡然燈為上五方八極地獄幽

牢存陰極之鄉長夜之境死鬼囚閉不見三光冥間之間經諸拷掠宜造一燈樹然九厄燈自初終亡至於七七燈光相續下照九幽觀此光明即當解脫又以繒線造遷神寶幡長四十九尺或作小幡七首懸於長竿任風飛颺禹罪皆滅又紙墨練素書寫此經散施學人流傳讀誦亡鬼超度地獄冤閉福善所資應延後世其有珍玩服飾平昔資財廣施寒栖濟卹貧乏此之功德亦類於前黑籍落名地司除簡神升淨土隨願往生利佑子孫斷絕殃疰巍巍福善難可稱量是故應當勤心諦受宣行付囑普度人天爾時會中聞此法緣高尊上聖三界真仙侍衛威靈天兵騎史無數數眾一切職司洞達無為齊升道果三宮地獄無量罪鬼俱獲善功應時解脫十方諸獄鑪炭鏤湯盡變清涼無復憂苦天真大上天人龍鬼預在法筵聞此經典歡喜信受恭敬奉行作禮而退

太上而玄靈寶三塗五苦拔度生死妙經